



Inatsisartuni ilaasortaq
Per Rosing Petersen
Attaviitsoq

Silaannakkut angallannerup ilusaanik allannguneq pillugu § 37 naapertorlugu apeqqummut nr. 225-mut akissut

Brevdato: 09-09-2016
Sags nr.2016 - 13316
Dok. nr. 13074362

Asasara Per,

Aallarniutigalugu silaannakkut angallannerup ilusaanik allannguneq pillugu apeqquinnut, Inatsisartut suleriaasianni § 37 naapertorlugu nassiussimasannut qutsavigaakkut.

Postboks 909
3900 Nuuk
Tlf.: (+299) 34 50 00
Fax: (+299) 32 52 86
E-mail: isan@nanoq.gl
www.naalakkersuisut.gl

Apeqquut 1.

Naalakkersuisut qanoq qulakkeerniarpaat, inuiaqatigiit tamatta akilikkatsinnik, angallannermi aaqqiiniasarinertik aamma SIK-mi ilaasortaanut pissakittunullu akitigut iluaqutaassasoq?

Akissut:

Kalaallit Nunaanni timmisartunut, Imapik qulaallugu angalasartunut mittarfinnut nutaanut taakkunanngaanniillu angallaviit maanna Imapik qulaallugu timmisartunut mittarfinnut angallavinnut maleruagassat assiginik maleruagassaqartinneqassapput. Tassalu akit annerpaaffissaannik, Danmarkimi silaannakkut angallassinermut oqartussaasunit akuerineqartussanik aalajangersaasoqassaaq. Angallavinni taakkunani akit allat niuernerimi nukit tunngavigalugit aalajangersarneqartassapput, unammillerneqarnerullu annertusinissaanik naatsorsuuteqarneq akit apparnissaannut sunniuteqassasoq naatsorsuutigineqarsinnaavoq.

Sumiiffinni niuernerimik tunngaveqarani sullinneqartuni kiffartuussinissamut isumaqatigiissutit, nunap karsianit tapiiffigineqartartut tunngavigalugit timmisartuussisoqartarpoq.

Naalakkersuisut siunissamut ungasissumut suliniummik ingerlataqarput, taannalu silaannakkut angallassinermut attaveqaatit allanngortiterneqarnissaannut tunngasuuvuq, kiffartuussinissamut isumaqatigiissutit sipaarfigineqarnissaat aammalu angallavinni unammillerfiusuni akit akikinnerulernissaat siunnerfigineqarluni. Suliniutit taakku ukiakkut ataatsimiinnermi: UKA2015/18-imi aamma UKA2015/167-imi immikkoortut, kiisalu attaveqaatinut aningaasaliinissaq pillugu isumaqatigiissutit 2. december 2015-imeersup akuerineqarnerisigut ersarissarneqarput, tamannalu siunissami kikkut tamarmik Kalaallit Nunaannut, Kalaallit Nunaanniit taamatullu Kalaallit Nunaata iluani timmisartortarneri akikinnerulersinniarlugu suliniutit ataqatigiissutit isigineqassaaq.

Pingaartumik UKA2015/167-imi sumiiffinni, ullumikkut kiffartuussinissamut isumaqatigiissutit tunngavigalugit timmisartuussivigineqartartuni qulimiguulik atorlugu

timmisartuussisarnerit timmisartut suluusallit, annerpaamik 19-inik ilaasoqarsinnaasut atorlugit timmisartuussisarnerit taarserneqarsinnaanissaat siunertarinearpoq. Taamaalilluni angallavinni timmisartuussisarnerup akulikinnerulernissaanut tunngavissaqartoqalissaaq, tamatumalu peqatigisaanik kiffartuussinissamut isumaqatigiissutit sipaarfigineqarsinnaassapput, tamannalu aqutugalugu bilitsit akikinnerulernissaat qulakkeerneqassalluni.

Tassalu Naalackersuisut akit appasinnerulernissaannut tunngavissanik pilersitsiniarlutik akit ilusaanik allangortiterinissamik suliaqaratik, kisiannili attaveqaatit allangortiterneqarnissaannik suliaqarnissaat matumani tunngavigineqarpoq.

Apeqqut 2.

Assersuutigalugulu

- a) Qaqortumiit Nuuliarneq**
- b) Qasigianguaniit Ilulissanut**
- c) Qeqertarsuariit Ilulissanut**
- d) Tasiilamiit Nuummur**

billetsit nalinginnaasut (qorsuk) siumut utimullu massakut qanoq akeqarpat (tapiissutitaqanngitsumik/tapiissutitalimmillu)? Siunertarsilu tunngavigalugu aaqqiissagussi qanoq akikinnerutigilissappat?

Akissut:

Air Greenland aktianik piginneqatigiiffiuvoq, tapiissutillu pillugit paasissutissat Air Greenlandimit niuernermit isertukkatut isigineqarput. Akit tapiissutitalit maanna atuuttut Air Greenlandip nittartagaani takuneqarsinnaapput.

Uku akornanni immikkoortitsinissaq pingaaruteqarpoq:

- Angallaviit taamaallaat unammillerfigineqarlutik ingerlanneqartut.
- Angallaviit kiffartuussinissamut isumaqatigiissutit tunngavigalugit timmisartuussivigineqartut.

Tassalu apeqquumi assersuutitut saqqummiunneqartut assersuutigineqarsinnaanngillat, assersuummi angallavik a aamma d unammillerfiummata, aammalu angallavik b aamma c kiffartuussinissamut isumaqatigiissut tunngavigalugu timmisartuussiviullutik.

Tassalu siunissami assersuutigalugu angallavik b-mi aamma c-mi kingulliulluni atuisussap kingulliup akiligassaanut, sullissisup isorliunerusuni kiffartuussinissamut isumaqatigiissutinut isumaqatigininniarnerni angusai timmisartuussinissamut akigititassanut apeqqutaasassapput.

Angallavik a-mut aamma d-mut akit tunngaviummik taamaallaat unammilleqatigiinnermi pissutsit allangornerisigut allangortinneqarsinnaapput, tassungalu tunngatippiarlugu Naalackersuisut silaannakkut angallannermut attaveqaatinik nutaaliaasunik, siunissami tamatumunnga qulakkeerisussanik pilersitsiniarlutik sulipput. Mittarfinnik alliliinissani sanaartornermut ingerlatsinermullu aningaasanut tunngasorpiaat suli aalajangersarneqanngillat, taakkulu aamma sullissisut siunissami akinik aalajangersaasarneranut tunngavigineqartussaapput.

Tassalu Naalackersuisut angallavinnut aalajangersimasunut akinik
aalajangersaasinnaangillat, kisiannili attaveqaatit pitsaanerulersinneqarnerisigut,
kiisalu kiffartuussinissamut isumaqatigiissutit neqerooruteqartitsivigisarnerisigut akinik
appaanerup pisinnaanissaanut sinaakkutissanik pilersitsisinnaapput.

Inussiarnersumik inuulluaqqusillunga

Knud Kristiansen